

Internet, adoré les potenzialitès ma capì i risc

Chisc dis passés el vegnù metù a jì a Trent l Safer Internet Day 2011, sun la doura segura y responsabla dles technologies nuevas, souraldut anter i joegn

Internet - Sun indicazion dla Union Europeana el vegnù metù a jì enche chest ann l Safer Internet Day, la giornada dedicheda a la segurezza tla rei. L slogan de chest ann è: "Al è plu che n juech, al è tla vita" y al reverda l raport anter vita reala y vita virtuala, con referiment spezifich ai juecs on line.

Encuei passa i joegn bona pert de sie temp lede anter i juecs on line y i social network, da chilo ruvel l debutegn de tò fora percurs per genitours, ensegnanc y bec, acioche chisc strumenc posse vegni adorés a na maniera positiva y senza conseguenze pericolouses.

Con la colaborazion dl dotour Michele Facci y l sostegn dla Polizia dles Comunicacions y dl Comitad Unicef de nosta Region a les Istituzions dla Scuola raté oportun crié na rei concreta per ti fé front

ai pericui dla rei virtuala. Perchel a i Dirigenc scolastics colaboré ativamente per la promozion dl event te nosta provinzia, metan a jì na giornada de sensibilizazion sun chisc temesc per jent grana y student tres scomenciadives desvalives.

A Trent a dauri i laours ilò dal Liceo Galilei l'assessoura provinciala Marta Dalmaso, che a ringrazié duc i promotores dla scomenciadiva per avei sport enche chest ann la oportunité de se fermé a pensé n mingul plu sot sun chest argument, conscidré oramai da duc i esperc l cuer dla sozieté moderna: l contat con l mond virtual, che se confon y diventa de fat real.

La scola a segur na pert fundamentala te chest cheder - a ciamò dit l'assessoura Dalmaso -

les giornedes dedichedes va debutegn per focalisé miec l problem ma dō el tì laour da duc i dis che an pō mudé dassen les cosces enche te chest ciamp strategich.

L dirigent dl Galilei Flavio Dalvit a ilustré a na maniera scempra y clera ejempli de potenzialitès positives tla rei, depierpul che l expert Michele Facci, enche atour de n liber sun l argument dal titul "Le reti nella rete", a mostré video "for", sciche enche l ispetour dla Polizia dles Comunicacions Mauro Berti, con joegn protagonisè "dla y tla rei", per fé mete a verda dai pericui y dai risc evidenc y sconus. Duc dō i sottrissé che Internet pō arvejiné persones dalonc y porté demez persones vejines.

D'autres analises y d'autri stimuli é vegnus da esperc sciche Elisa



L logo dla scomenciadiva

Gabbi, Fabio Pipinato, Aldo Gabbi, Michele Ruele, Serena Valorzi y

ciamò da student y studentes "nascius tl temp digital".

A la leta i stipendium per jir a la foresta

La Region Trentin Sudtirol fèsc a saer che enche chest an l'é a la leta i stipendium per jir a studièr n an a la foresta. I student de scola auta enteressé a temp ensin ai 28 de firé per prejentèr la domana

Scola - Studièr e viver per n an alalongia a la foresta, te Austria, Germania, Gran Bretagna, Irlanda, o Francia, na possibilità dassen de valuta e n muie aprijèda da tropes joegn, perveduda da la legislaizon scolastica taliana e sostegnuda da la Region Trentin Sudtirol, che enche chest an met a la leta i student de scola auta 60 stipendium per l'an de scola 2011/2012.

La scomenzadiva, che se met dant de sostegnir l'integrazion europeana, se ouc ai student residenc te noscia region che fèsc la terza clas de scola auta tel Trentin Sudtirol o ti comuns vejins, desche

Pedemonte, Col Sènta Luzia, Ampez, Fodom, Magasa e Valvestino, che i vel perfezionèr sia cognoszenzes linguistiche e se confronton con la cultura e la tradizion de un di cinch Paiejs che desc alberch. L'an de scola passà a la foresta vegn dapò recognosciu te la Tèlia. L stipendium de la Region cour la speises de magnèr e de stèr soranet, de tasses scolastiches e libes e per la doura de duta la atrezatures de scola. No l'è ite la speises de viac e cheles de trasport di mesi publics sul post, la raides scolastiches e la speises personèles.

L'é temp per portèr dant la

domana ensin ai 28 de firé ti Ofizies per l'Integrazion Europeana e i Aiuc Umanitèrs alò da la Region Trentin Sudtirol a Trent, V. Gazzoletti 2 o a Busan, Piazza Università 3.

Per maor informazions se pel telefonèr a Trent al numer 0461/201344 o a Busan al numer 0471/322122 o jir sul sit www.regionetaa.it/europa, olache se pel enche descarièr i formulèrs per prejentèr la domanes. N comitat de valutazion aldò valutarà la domanes ruèdes, verifican la cognoszenza di lengac di candidac e sia preparazion su la nozion de basa in materia europeana.



Studièr e viver per n an a la foresta l'é na esperienza dassen de gran valuta.

Ejames de ladin

La neva sescion pea via con la proa scritta ai 7 de oril. Ge vel se ensinuer dant dai 14 de mèrz

L'é fat fora l calandèr di ejames per l zertament de la cognoszenza del lengaz ladin. Per chel che vèrda l'ejam de secont livel per aspiranc a posé de la ex carieres diretives e de conzet, che perveit na proa scritta e na proa a ousc, la proa scritta vegnarà metuda a jir en jebia ai 7 de oril del 2011 a scomenzèr da les 14.30 alò da la senta del liceo a Poza, e la proes a ousc, demò per i candidac che te la proa scritta

arjone amàncol 7/10, pearà via en jebia ai 28 de oril te la medema senta.

Per chel che vèrda l'ejam de prim livel per aspiranc a posé de la ex carieres esecutives e ausilières, che perveit demò la proa a ousc, l pearà via en luncsc ai 2 de mè, sempre te senta del liceo a Poza.

Chi che vel tor pèrt a l'ejam e che no se à amò ensinua i pel i fer inant de luncsc ai 14 de mèrz

del 2011, prejentan a man la domana opura la manan per fax (0462/760001) opura amò per posta racomanèda con avis de rezeviment (te chest cajo arà valuta la data del stempel de la posta).

I formulèrs pel vegnir domané enche trèrs la mail docentisecondaria@scuoladifassa.it o descarié da www.scuoladifassa.it. Per informazions telefonèr al 0462 760340.

La Mendranzes rua su Facebook

Ence l Servije Mendranzes Linguistiches de la Provinzia autonoma de Trent a publicà sia piata sun l social network più de nonzech tel mond



La piata del Servije Mendranzes Linguistiches de la Provinzia de Trent te facebook.

Internet - Duc chenc oramai cognosce Facebook, la piataforma sozietà che desc l met de se coleèr con chi che se vel, amisc e peconc coi medemi enteresc da spartir. Milions de contac, na rei che fèsc ite l mond entriech e che tel mond la é enche bona de orientèr tendenzen, idees, movimenc.

Da pech enche l Servije Mendranzes Linguistiches de la Provinzia autonoma de Trent publica sia piata Facebook. Na oportunité in più de tor ite la realtèdes de la comunitàdes linguistiche de mendranza del Trentin e de l'Europa. Chesta piata vel se proponer desche veicol per na cognoszenza dedicheda ai lengac manco slarié fora, outa al confront e al barat de imprescions, de idees, de notazions scempies

sun chel che sozet te la comunitàdes bilingues, no demò trentines.

La piata defat é stata pissèda en relazion al projet "Rete Europea per i diritti linguistici dei cittadini di minoranza", lurà fora da cater joegn del servije zivil, impegné dal meis de settember del 2010 te la creazion de n database de direzioni e profii de jent desponibola al dialogh, a la crescimonia culturèla, a la desvarianza linguistica. Chesta neva piata, apea da duta l'autres jà on line te l'univers del web, vel sporjer na ocajon neva per sostegnir chest projet: proponeta de dialogh, veicolazion de paroles, lech de enconter anter la desvaliva mendranzes linguistiche, cultures e identitèdes.



La Provincia di Trento sostegn sia mendranzes linguistiche